


Newsletter Canada

Grüezi

Als churzi Vorinformation erklär ich na die Familiekonstellation vo üsere Gastfamili!



Ich hoffe ihr chömed mit minere erklärig z schlag! De Randy Slager und d Dawn Wiebe-Slager sind Gschwüschtetel!

So fertig erklärt! Jetzt gits z lese und z luegä!

Ostersonntag

24. April

Hüt morgue früeh hend mir Bsuech übercho vom Thomas Gut. Er isch au en Trainee (Stift) us de Schwiz. Tätig isch er bimene andere Farmer us em Staat Manitoba. Bi üs i de Region hend die Kanake sehr en strenge Winter gha. Mit ihm hend mir denn ä landschaftserkundig richtig Roblin unteno und sind go luege wo überall Wasser über d Stross ine glaufe isch. Au nebet de Strosse hets richtigi Seeä. Also ich chan mir das nunig so gnau vorstellä das mir setet, am gliiche Ort wos jetzt Wasser het, no Saatguet here tue. S Heiweh ploget eim scho chli, aber nöd wils heiweh isch sondern wils kei bergä hät! Drum machet mir doch en CH-Obig und chochet es feins Fondue!

En Guetä

Newsletter Canada

Ostermäntig

25. April

Schaffe! Am obig het de Ueli entdeckt, das üsere Cheller unter Wasser stoht! Als sofortmassnahm hend mir mal es Bier trunke und müesse drüber entscheide was mir wend mache. S ergebnis isch xsi, dass die 10 cm Wasser us em Celler use müend. Da hend mir doch die brillianti idee gha zum e Wasserpumpi z installiere. (Isch nöd mol so schlecht cho!) Mir hend üs denn nüme wiiter drum kümmeret.

Meeting IRE

26. +27. April

Am 26. simer uf Brandon Manitoba a die Infoveranstaltig gange vo eusere Stiftevermittlig. Mir händ ganz viel Schwiizer troffe, wo über ganz Manitoba und Saskatchewan verteilt sind. Mir händ zwei lustigi Täg verbracht mit Usgang, Bowling, Esse und viel Schwätze usw.

Schneesturm

30. April

Am Fritigabig simer widermal uf Erkundigsfahrt gsi. Z Russel simer am schluss inere Bar glandet. Womer usecho sind hät das ghudlet und gstürmt wie im tüüfschte Winter. Jetzt häts nüme gregnet sondern gschneit. Nacheme kurze Breefing hämer eus entschlosse, zum doch heifahre. Mer hät während em fahre eigentlich nüd gseh, aber wämer e paar isch, gseht sicher immer eine öbis. Euse chli Chevi hät sich tapfer dur dä Schnee kämpft (mit Summerpneu). Mit öbe einere Stund verspötig simer dän doch no dihei acho.

Am morge isches komisch kalt gsi i eusem Hüüsli, käs Liecht isch meh gange. En klare Fall vomene Stromusfall.


Verusse häts immer no ghudlet wie im tüfschte Winter. Am Namittag isches dine nüme viel wärmer gsi als dusse, drum simer dän au froh gsi wo am halbi vieri dä Pfuss wider da gsi isch.



Werkstage

02. -07. Mai

Ganz normali Arbeitswoche im Shop! Da gits nöd viel drüber z brichtä! Das mit dem Schnee het sich wieder chli normalisiert. Jetzt chönd mir en zweite Frühlig erläbe! ☺ Au de Abfall muess weg!



Newsletter Canada

Muttertag

08. Mai

A dem Sunntig isch Muettertag! **Danke liebi Mami's für das won Ihr machet für eus zwei!** Übercho tüend ihr nüüt, will Ihr hend ja s'Gschenk mit üüs. ☺ Da hend miir üs öppis ganz speziells iifalle loh! Zwar nöd für üsi Mami's aber für üüs. Mir hend für dä z'Morgä en Zopf bachet!



No öppis für de Gluscht z stillä:



Bis zur nächsten Ausgabe des Newsletters....

Viele Grüsse in die Heimat, aus Übersee